

***Tarikh Dibaca: 28 APRIL 2017M | 01 Syaaban
1438H***

KHUTBAH JUMAAT

Tajuk:

***“PEKERJAAN SEBAGAI HAMPARAN
SEJADAH”***

***Terbitan:
Unit Khutbah
Bahagian Pengurusan Masjid***



JABATAN AGAMA ISLAM SELANGOR

SENARAI AHLI JAWATANKUASA KHUTBAH NEGERI SELANGOR 2017

1. **SS. Dato' Haji Haris Bin Kasim** (Pengerusi)
Pengarah Jabatan Agama Islam Selangor
2. **SS. Dr. Haji Anhar Bin Haji Opir** (Ahli)
Timbalan Mufti, Jabatan Mufti Negeri Selangor
3. **Tuan Haji Idris Bin Ramli** (Setiausaha)
Ketua Penolong Pengarah, Bahagian Pengurusan Masjid, JAIS
4. **Yg. Berbahagia Dr. Haji Osman Bin Haji Sabran** (Ahli)
Pensyarah, Universiti Selangor
5. **Dato' Haji Abdul Majid Bin Omar** (Ahli)
Ahli Jawatankuasa Fatwa Negeri Selangor
6. **Tuan Haji Hamid Bin Md Isa** (Ahli)
Pensyarah, Kolej Universiti Islam Selangor
7. **Tuan Haji Md. Sahari Bin Abdullah** (Ahli)
Ahli Jawatankuasa Fatwa Negeri Selangor
8. **Tuan Haji Abdul Halem Hapiz Bin Salihin** (Ahli)
Ketua Penolong Mufti (Fatwa), Jabatan Mufti Negeri Selangor
9. **Ustaz Muhammad Farhan Bin Wijaya** (Ahli)
Imam Besar Masjid Sultan Salahuddin Abdul Aziz Shah
10. **Ustaz Indera Shahril Bin Mohd Shahid** (Ahli)
Pegawai Majlis Agama Islam Selangor
11. **Ustaz Hairol Azmi Bin Khairudin** (Urusetia)
Penolong Pengarah Unit Khutbah, BPM, JAIS



"PEKERJAAN SEBAGAI HAMPARAN SEJADAH"

الْحَمْدُ لِلَّهِ الْقَائِلِ: وَقُلِ اعْمَلُوا فَسَيَرَى اللَّهُ عَمَلَكُمْ
وَرَسُولُهُ وَالْمُؤْمِنُونَ وَسَتُرَدُّونَ إِلَىٰ عِلْمِ الْغَيْبِ
وَالشَّهَادَةِ فَيُنَبِّئُكُم بِمَا كُنتُمْ تَعْمَلُونَ ¹
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ
أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلَى
سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ. أَمَّا
بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى: يَا أَيُّهَا
الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنتُمْ
مُسْلِمُونَ.

Muslimin yang dirahmati Allah sekalian,

Marilah kita bersama-sama tingkatkan ketakwaan kepada Allah SWT dengan sebenar-benar takwa dengan mengamalkan apa yang diperintahkan oleh-Nya dan menjauhi segala larang-Nya.

Mimbar pada hari ini akan membicarakan khutbah yang bertajuk **"PEKERJAAN SEBAGAI HAMPARAN SEJADAH"**.

¹ At-Taubah ; 105



Hadirin tetamu Allah SWT sekalian,

Islam memandang mulia kepada orang yang bekerja dan membenci orang-orang yang malas dan suka meminta-minta. Nabi SAW mengingatkan melalui hadis riwayat daripada Zubair bin al-Awwam R.Anhu dengan sabdanya bahawa;

لَأَنْ يَأْخُذَ أَحَدُكُمْ حَبْلَهُ ، فَيَأْتِيَ بِحُزْمَةِ
الْحَطَبِ عَلَى ظَهْرِهِ، فَيَبِيعَهَا، فَيَكْفِيَ اللَّهُ بِهَا
وَجْهَهُ خَيْرٌ لَهُ مِنْ أَنْ يَسْأَلَ النَّاسَ أَعْطَوْهُ أَوْ
مَنْعُوهُ

"Sekiranya seseorang darimu membawa tali pergi memberkas kayu, dan dipikul di atas belakangnya, kemudian dijual, lalu Allah memelihara air mukanya, itu lebih baik dari dia meminta-minta sama ada diberi atau tidak".

Sesungguhnya para nabi Alaihimus Solatu Wassalam yang telah diutuskan juga bekerja. Nabi Adam bertani, Nabi Idris tukang jahit, nabi Nuh dan Zakaria tukang kayu, Nabi Daud bertukang besi. Nabi Musa mengembala kambing. Nabi Muhammad juga berniaga. Begitu juga dengan para sahabat. Abu Bakar AS-Siddq menjual pakaian, Umar Bin al-Khattab mengusahakan perniagaan kulit, Uthman bin Affan seorang pedagang yang amat berjaya, Begitu juga dengan Abdul Rahman bin Auf, Talhah bin Ubaidillah, az-Zubair bin al-Awwam, Amr bin al-Ash dan lain-lain sahabat Radiallahu Anhum. Para sahabat memiliki pekerjaan masing-masing dalam rangka mencari penghidupan di dunia bahkan mereka menggunakan harta pencarian mereka untuk diinfaqkan kejalan Allah.



Para hadirin sekalian,

Islam menggalakkan umatnya bekerja keras kerana hampan dunia ini ditabur dengan pelbagai rezeki Allah sama ada diatas permukaan bumi atau dari dalam perut bumi, dilautan dan diangkasa. Semuanya boleh diusahakan oleh manusia dengan akal dan ikhtiar yang dibekalkan oleh Allah kepada manusia. Islam tidak menyuruh kita solat secara berterusan atau duduk beriktikaf didalam masjid sepanjang masa. Saidina Umar sendiri pernah mengusir orang yang sedang berdoa didalam masjid sedangkan ketika itu telah masuk waktu dhuha sambil berkata: "Langit tidak menggugurkan emas dan perak dengan hanya berdoa".

Para tetamu Allah sekalian,

Ibadah didalam Islam perlu difahami dalam konteks yang luas dan menyeluruh. Ibadah tidak hanya tertumpu pada solat, puasa, zakat, haji, zikir, baca al-Quran, bersedekah, berjihad dijalan Allah dan seumpamanya. Bahkan Islam turut memasukkan dalam maksud ibadat ialah bekerja. Rasulullah SAW pernah mengajar kepada para sahabat secara tidak langsung maksud bekerja sebagai ibadat.

Abu Hurairah R.Anhu meriwayatkan bahawa pada suatu ketika, beberapa orang sahabat melihat seorang pemuda yang kuat dan rajin bekerja. Mereka pun berkata; Alangkah baiknya jika dia berjihad di jalan Allah. Rasulullah segera menjawab: Jangan kamu berkata seperti itu. Jika dia bekerja untuk menafkahkan anak-anaknya yang masih kecil maka dia berada dijalan Allah. Jika dia bekerja untuk menafkahkan kedua orang tuanya yang sudah tua, maka dia dijalan Allah. Dan jika dia bekerja untuk memenuhi keperluan hidupnya, maka dia dijalan Allah.

(Riwayat al-Baihaqi).



Oleh itu, setiap pekerjaan yang dilakukan hendaklah mengelak diri daripada penipuan, penyelewengan salah guna kuasa, tidak beramanah, tidak bersungguh-sungguh dalam pekerjaan dan seumpamanya kerana pekerjaan itu tidak terlepas daripada ikatan ibadat. Sebab itu orang yang solat tidak menipu bilangan rakaat solatnya, ketika berpuasa dia tidak makan secara bersembunyi walaupun yakin tidak dilihat oleh sesiapa pun. Semua ini kerana dia faham bahawa solat dan puasa itu adalah ibadat. Oleh itu roh ibadat perlu dimasukkan dalam alam pekerjaan jika ingin melahirkan pekerja yang berkualiti.

Hadirin sidang Jumaat sekalian,

Ada beberapa perkara yang perlu diperhatikan oleh setiap muslim yang bekerja agar pekerjaannya dapat meraih keuntungan di dunia dan juga di akhirat. Bahkan pekerjaannya mempunyai nilai-nilai ibadah yang diredhai dan diterima oleh Allah. Antara perkara-perkara tersebut ialah;

1. Pekerjaan yang dijalani mestilah pekerjaan yang baik dan patuh syariah.

Tidak boleh bagi seorang muslim bekerja dalam bidang yang digolongkan oleh Islam sebagai maksiat dan mendatangkan kerosakan seperti bekerja di kelab malam, tempat pelacuran, perjudian, arak, institusi kewangan tidak patuh syariah dan seumpamanya.

2. Bekerja dengan tekun dan bertanggungjawab.

Islam bukan sekadar menyuruh umatnya bekerja tetapi dalam masa yang sama memerintahkan agar bekerja dengan tekun, amanah dan bertanggungjawab.

3. Niat bekerja sebagai ibadat dan mencari redha Allah.



Bekerja dengan niat yang baik kerana Allah, akan mengangkat martabat pekerjaan itu daripada pekerjaan yang biasa-biasa sahaja kepada pekerjaan sebagai satu ibadat. Pekerjaan itu mampu menjana pahala yang amat besar bahkan dianggap sebagai amal soleh. Pekerjaan itu seolah-olah suatu hampan sejadah yang luas. Diberi keberkatan di dunia dan diberi pula ganjaran yang baik di akhirat.

4. Tidak mengabaikan kewajipan kepada Allah.

Walau apa pun pekerjaan kita, namun kewajipan kita terhadap Allah jangan diabaikan seperti solat lima waktu, berpuasa di bulan Ramadhan dan sebagainya.

Hadiin Jumaat yang dirahmati Allah sekalian,

Islam memandang mulia kepada orang yang bekerja untuk menyara kehidupan diri dan keluarganya dengan pendapatan yang bersih dan halal. Keletihan dalam mencari rezeki yang halal sepanjang hari akan diberi ganjaran yang besar oleh Allah.

Realitinya tidak semua orang dapat bekerja dalam bilik yang berhawa dingin. Sesetengahnya terpaksa bekerja ditengah terik panas matahari. Melakukan kerja-kerja berat yang amat meletihkan. Namun begitu Allah tetap memandang kepada mereka dengan keampunan dan kasih sayang jika mereka bekerja dan menjaga hak-hak Allah seperti menjaga solat lima waktu, berpuasa pada bulan ramadan dan seumpamanya.

Bahkan keletihan dan susah payah dalam mencari rezeki akan diberi pengampunan dosa-dosa yang lalu oleh Allah SWT. Hadis daripada Anas Bin Malik R.Anhu bahawa Rasulullah SAW bersabda yang bermaksud;



"Sesiapa yang tidur dalam keletihan kerana mencari rezeki halal, maka dia tidur dalam kemapunan Allah SWT".

(Riwayat al-Tabrani).

Muslimin yang dirahmati Allah sekalian,

Sesungguhnya dalam kegigihan mencari pekerjaan itu, pastikan harta yang diperolehi tidak melalui pekerjaan yang bertentangan dengan syariah.

Firman Allah SWT dalam surah al-Baqarah ayat 188;

وَلَا تَأْكُلُوا أَمْوَالَكُمْ بَيْنَكُمْ بِالْبَاطِلِ وَتُدْلُوا بِهَا إِلَى
الْحُكَّامِ لِتَأْكُلُوا فَرِيقًا مِّنْ أَمْوَالِ النَّاسِ بِالْإِثْمِ وَأَنتُمْ
تَعْلَمُونَ

"Dan janganlah kamu makan (atau mengambil) harta (orang-orang lain) di antara kamu Dengan jalan Yang salah, dan jangan pula kamu menghulurkan harta kamu (memberi rasuah) kepada hakim-hakim kerana hendak memakan (atau mengambil) sebahagian dari harta manusia Dengan (berbuat) dosa, padahal kamu mengetahui (salahnya)".

Takutlah dengan pendapatan yang tidak bersih atau tidak halal khususnya amalan rasuah yang berlaku dalam urusan pentadbiran dan seumpamanya. Statistik yang dikeluarkan oleh Suruhanjaya Pencegahan Rasuah Malaysia (SPRM) mengenai tangkapan terhadap pelaku rasuah bagi tahun 2016 terhadap penjawat awam atau pegawai kerajaan dan juga orang awam ialah sebanyak 939 tangkapan. Namun begitu jumlah ini akan lebih besar lagi jika dikira daripada pelaku atau pemakan rasuah yang masih bebas melakukannya.



Bayangkan jika pelaku rasuah ini pulang ke rumah dengan membawa hasil daripada amalan rasuah yang mereka perolehi, lalu diberikan kepada anak-anak dan isteri serta ibubapa, maka akan tersebarlah hasil amalan rasuah itu kepada sejumlah besar manusia. Akibat menggunakan harta hasil rasuah itu, maka akan hilang barakah dan rahmat daripada Allah. Mereka tidak akan mendapat rahmat dan kasih sayang Allah. Dicabut rasa tenang dan bahagia dalam kehidupan rumah tangga walaupun dilihat keluarga itu penuh dengan kesenangan.

Oleh itu, pastikan hasil yang dibawa balik ke rumah adalah halal. Hasil yang haram ditakuti akan memberi kesan kepada anak-anak dan ahli keluarga di rumah. Mereka mungkin tidak tahu bahawa apa yang mereka makan dan pakai itu dari sumber yang haram. Maka kewajipan kita untuk memastikan bahawa yang masuk ke dalam rumah hanyalah yang halal sahaja.

Muslimin sekalian,

Mengakhiri khutbah hari ini, mimbar Jumaat ingin menyeru dan berpesan kepada sidang jumaat sekalian bahawa;

1. Umat Islam hendaklah meyakini bahawa tujuan diciptakan itu adalah bertujuan untuk beribadat.
2. Umat Islam hendaklah mencontohi para Nabi yang rajin bekerja dan beribadah.
3. Umat Islam hendaklah mencari rezeki melalui pekerjaan yang baik dan patuh syariah.
4. Umat Islam hendaklah rajin bekerja dan menjauhi sifat-sifat malas dan meminta-minta.



5. Umat Islam hendaklah meyakini bahawa pekerjaan yang haram membawa ke neraka.

أَعُوذُ بِاللَّهِ مِنَ الشَّيْطَانِ الرَّجِيمِ
وَأَبْتَغِ فِي مَا آتَاكَ اللَّهُ الدَّارَ الْآخِرَةَ وَلَا تَنْسَ
نَصِيبَكَ مِنَ الدُّنْيَا وَأَحْسِنْ كَمَا أَحْسَنَ اللَّهُ إِلَيْكَ
وَلَا تَبْغِ الْفَسَادَ فِي الْأَرْضِ إِنَّ اللَّهَ لَا يُحِبُّ الْمُفْسِدِينَ



"Dan tuntutan dengan harta kekayaan yang telah dikurniakan Allah kepadamu akan pahala dan kebahagiaan hari akhirat dan janganlah engkau melupakan bahagianmu (keperluan dan bekalanmu) dari dunia; dan berbuat baiklah (kepada hamba-hamba Allah) sebagaimana Allah berbuat baik kepadamu (dengan pemberian nikmat-Nya yang melimpah-limpah); dan janganlah Engkau melakukan kerosakan di muka bumi; Sesungguhnya Allah tidak suka kepada orang-orang yang berbuat kerosakan".

(al-Qasas ; 77)



بَارَكَ اللَّهُ لِي وَلَكُمْ فِي الْقُرْآنِ الْعَظِيمِ،
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ
هُوَ الْغَفُورُ الرَّحِيمُ.

Shopuan /Nurul
25.04.2017



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ
الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ،
أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا
صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِنَا وَمَوْلَانَا مُحَمَّدٍ سَيِّدِ
الرُّسُلَيْنِ وَارْضَ اللّٰهُمَّ عَنْ اَصْحَابِهِ وَقَرَابَتِهِ
وَاَزْوَاجِهِ وَذُرِّيَّاتِهِ اَجْمَعِينَ.

اَللّٰهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ الْاَحْيَاءِ مِنْهُمْ وَالْاَمْوَاتِ، اِنَّكَ سَمِيعٌ
قَرِيبٌ مُّجِيبُ الدَّعَوَاتِ يَا قَاضِيَ الْحَاجَاتِ. اَللّٰهُمَّ
اِنَّا نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِينِ، وَنَسْأَلُكَ
بِاسْمَائِكَ الْحُسْنٰى وَصِفَاتِكَ الْعُظْمٰى اَنْ تَحْفَظَ
بِعَيْنِ عِنَايَتِكَ الرَّبَّانِيَّةِ وَبِحِفْظِ وَقَايَتِكَ
الصِّمْدَانِيَّةِ، جَلَالَةَ مَلِكِنَا الْمُعْظَمِ سُلْطَانَ
سَلَاطُور، سُلْطَانَ شَرْفِ الدِّينِ اَدْرِيسِ شَاهِ الْحَاجِ
ابْنِ الْمَرْحُومِ سُلْطَانَ صَلَاحُ الدِّينِ عَبْدِ الْعَزِيزِ
شَاهِ الْحَاجِ. اَللّٰهُمَّ اَدِمِ الْعَوْنَ وَالْهِدَايَةَ وَالتَّوْفِيقَ،
وَالصِّحَّةَ وَالسَّلَامَةَ مِنْكَ، لَوْلِيَّ عَهْدِ سَلَاطُور،
تَغْكُو اَمِيرِ شَاهِ ابْنِ السُّلْطَانَ شَرْفِ الدِّينِ اَدْرِيسِ
شَاهِ الْحَاجِ فِي اَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ



يَا ذَا الْجَلَالِ وَالْإِكْرَامِ. اَللّٰهُمَّ اَطْلُ عُمْرَهُمَا
مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ، وَبَلِّغْ
مَقاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah, terimalah amalan soleh kami, suburkanlah jiwa kami dengan budi oekerti yang mulia, satukanlah hati-hati kami, kurniakanlah kami rezeki yang luas lagi barakah, kayakanlah kami dengan ilmu yang bermanfaat, lindungilah kami daripada bala bencana dan peliharalah kami daripada ajaran sesat seperti Syiah, Qadyani, dan lain-lain ajaran yang difatwakan menyeleweng dari ajaran Islam atau bertentangan dengan pegangan Ahli Sunnah Wal Jamaah. Ya Allah bukannya hati kami untuk mendirikan solat fardhu lima waktu, menunaikan zakat, mewakaf dan menginfakkan harta melalui Lembaga Zakat Selangor, Perbadanan Wakaf Selangor dan Tabung Amanah Pembangunan Islam Selangor.



رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ
نِعْمِهِ ۖ يَزِدْكُمْ، وَاسْأَلُوهُ مِنْ فَضْلِهِ ۖ يُعْطِكُمْ
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.
